

LA VOIX
DV PEUPLE
AV ROY,

Son Prince & bien-faïcteur.



A PARIS,

Chez la vefue JEAN REGNOVL, rue S. Iacques, à la Vigne d'Orfin, deuant les Mathurins.

M. DC. XVII.

AVEC PERMISSION: 13

THE NEWBERRY
LIBRARY

AV LECTEUR.

1617

LECTEUR, Tu pourras t'esbahir, pourquoy j'ay mis ce petit Discours en public: apres tant d'autres, qu'on a fait courir, sur le suiet de la mort du Marquis d'Ancre. Je satisferay ta curiosité, disant, que veritablement ie n'auois intention de ce faire du commencement qu'on en a parlé, toutesfois: voyant le peuple d'une commune voix, louer la resolution genereuse du Roy: qui estoit de se saisir de la personne de cest estranger (qui empietoit sur son Authorité souveraine) lequel: se voulant mettre en deffence y laissa le moule de son pourpoint. J'ay creu deuoir à sa Majesté, ce tesmoignage de ses subjects: & à Messieurs les Princes retirez de la Cour n'y a pas long temps, l'opinion que chacun a, qu'ils n'en estoient sortis qu'au suiet de cest homme: lequel mort, l'on croit qu'ils n'auront autre but, que le service de sadiète Majesté: sans d'icy en auant s'esloigner d'aupres de sa personne. Pour ce qui est de la Royne sa Mere, tu seras aduertty (Lecteur) que ceste vertueuse Princesse preoccupee de quelque affection qu'elle portoit à la Marquise d'Ancre, a aucunement fauorisé l'aduancement du Marquis, à son occasion: Mais il s'estoit par artifices, & mauuais moyens, attiré de luy-mesmes, l'insolente authorité, qui l'a plongé dans le precipice de sa rüme.



LA VOIX
DV PEUPLE
AV ROY,
Son Prince & bien-faicteur.

C'EST aujourd'huy (SIRE) c'est
aujourd'huy que ie respire sous
l'Astre fauorable de vostre Ma-
jesté. C'est aujourd'huy que,
sans crainte des supplices & des
gibets, i'ose vous recognoistre pour mô Prin-
ce absolu: Car auparauât ceste heureuse jour-
née, vostre Majesté n'estoit que le manteau,
duquel se couuroit le tyran de vostre Estat:
les violences, surcharges, & despences inuti-
les se faisoient en vostre nom: Il vengeoit ses
passions par vos armes, établissant sa tyran-
nie de vostre grandeur, afin de l'opprimer
par apres, lors qu'il en eust eu peu à peu, tiré
tous les moyens de son établissement: Il
vous rendoit odieux à vostre Peuple par ces
iniques deportements, sans que vostre Ma-

jestéy contribuast aucune coulpe: Il chassoit vostre Noblesse, qui ne vouloit fieschir sous son insupportable joug lors que vous l'eussiez desiré: Il regorgeoit de tresors quand vous en estiez extrememēt diseteux: Il auoit à son leuer deux cens Gentils-hommes, & vous n'en auiez pas deux douzaines: Entroit-il dans vostre Louure tout estoit plain: En sortoit-il c'estoit vn desert. Quand on parloit de vostre Majesté, c'estoit comme d'un petit enfant. Parloit-on de Monsieur le Marechal tout trembloit, tout applaudissoit à ce seul mot. Enuoyoit-il le moindre des siens aux maisons de ceux qu'il auoit establis en vostre Conseil, fust-il Controllleur general des Finances ou autres, Quand vn Prince ou Seigneur de qualité & de merite eust parlé à luy, il le quittoit pour escouter le nouveau venu, quand ce n'eust esté qu'un simple valet de pied, & que ce Seigneur eust attendu deux heures à sa porte. Voila (SIRE) jusques à quel degré estoit monté l'insolence de cest homme sorty de la lye d'un peuple estranger.

Ces actions ne seroient pardonnables à quel que ce fust, mais on se fust moins estonné si c'eust esté un Gentil-homme nay François on a veu autrefois un des principaux Officiers de vostre Couronne, qui par sa valeur, & ses services recommandables, auoit gagné vne tres-grande autorité, en laquel-

5
le s'estant mescogneu il en descheut & perdit
la vie : Chacun plaignoit son mal'heur, &
eust-on desiré cest accident ne luy estre arri-
ué : Aussi estoit-il paruenü à ces charges par
les voyes d'honneur : Mais ce facquin icy,
poltron au possible, n'ayât rien de genereux,
n'auoit que des moyens violents & tyranni-
ques pour s'establi. Aussi n'a-on veu vn seul
homme de bien desplorer son desastre : au
cōtraire, ç'a esté vne joye si vniuerselle, qu'on
n'en a veu de nostre temps vne pareille, pour
quelconque bon-heur que nous soit surue-
nu. Vostre Majesté (SIRE) a eu plus de
gloire, & receu dauantage de benedictions
de son Peuple, d'auoir chastié ce tyran que si
elle auoit gaigné dix batailles : Car par le
sang d'vn seul homme si pernicious vous a-
uez espargné celuy de cent mille de vos sub-
jets desquels il eust causé la mort.

Les Lacedemoniens autrefois, se resiouirēt
plus de la victoire qu'Archidame fils d'Age-
silaüs leur Roy, obtint sur les Thebains à l'En-
tres, que de plusieurs autres par eux gaignées
en diuers endroits, à cause qu'il n'y eust vn
seul des leurs tué en ceste bataille qui fut sur-
nommée sans larmes. C'est dōcques auēc rai-
son que nous nous resiouissons de ceste gran-
de victoire que vous auez gaignée, en la quel-
le, on n'a veu le sang d'vn seul de vos subjects.

O Dieu que tes jugemens sont admirables!

Ie les considere en ceste action: Car tout ainsi que ces principales offences estoient faictes à vous (SIRE) aussi a-il permis que vous en prissiez la vengeance par vostre Commandement & non vn milion de personnes qu'il auoit mal traitez, specialement plusieurs Princes & Seigneurs qualifiez.

C'est ce grand Dieu qui vous a inspiré à vne si heureuse resolution. Il est le Protecteur des Roys, vous estes ses Oingts. Il conduit vos pas au sentier de Verité, & arme puissamment son Bras, pour chastier ceux qui entreprenent sur vos autoritez. Nous en auons plusieurs exemples (mesmes dans nos Histoires) que ie laisseray pour esuiter prolixité, & diray avec verité que cest homme seul estoit cause des miseres que nous auons souffertes depuis trois ans & demy en ça, par ses pernicieux déportemens. Car luy mort, vostre Majesté estant Roy de nom, & d'effect, au premier Commandement que vous auez fait à Messieurs les Princes, esloignez de la Cour, de poser les armes, congedier leurs troupes, & vous venir trouuer, dés aussi tost, ils ont posé les armes, renuoyé leurs soldars, & pris la Poste pour venir recevoir vos Commandements.

Ce sont (SIRE) des fruiets de vostre victoire, ce vous fera vn contentement nonpareil de vous voir tousiours enuironné de

7
Princes & Seigneurs, qui ne respireront que
l'honneur de vos bonnes graces, & qui vou-
droient auoir sacrifié mille vies (s'ils en a-
uoient autant) pour vostre seruice. Ne vous
fera-ce pas aussi vn autre grand contente-
ment, de voir dans vostre Conseil les bons &
anciens seruiteurs du feu Roy Henry le Grād
vostre Pere, que vous auez reestablis, d'entre
lesquels, on en peut mettre (en comparaisō)
auec les anciens Grecs, Demosthenes, Socra-
tes, Licurgues & Aristides, tant recomman-
dables à la Posterité. Au reste vostre Peu-
ple ne se lassera iamais de vous benir, & prier
pour vostre continuelle prosperité, esperant
de vostre Majesté tout bon-heur à l'aduenir,
par vn si genereux tesmoignage que leur
auez rendu maintenant. Heureuse doncques
& cent fois heureuse journée, dernière de
nos mal'heurs, & laquelle sera solemnisée
toutes les années, si ce n'est que l'on estime
ceste chetive creature, indigne qu'on s'en
ressouuienne, comme firent iadis les Ephe-
siens à l'endroit d'vn quidam, lequel pour
faire parler de luy à l'aduenir, mit le feu
dans le Temple de Diane. Voila (SIRE)
la voix commune de vostre Peuple, qui vous
souhaite d'vne sincere affection posseder vn
long siecle la Couronne de l'Empire du
Monde, & apres ceste vie receuoir au Ciel
celle d'Immortalité.

TESTAMENT ET ORDON- nance de dernière volonté

Du Marquis d'Ancre.

SONNET.

LE Marquis ne voulant, mourir sans testament,
De franche volonté, le fit en ceste sorte,
Je ne veux (ce dit-il) que pour moy dueil on porte
A ma mort, mais ie veux qu'on rie allegrement.

Je veux estre enterré vne nuit seulement,
L'ordonne par apres, qu'au gibet on m'emporte,
Puis qu'on brusle mon corps, & que le vent emporte
Mes cendres, mes desirs, & mon contentement.

Je laisse pour tousiours la Bastille à ma femme,
A mon frere vn regret de mon renom infame.
Peine belle Comté ie la donne à mon fils,

A Barbin mes mal'heurs, & la haine des Princes,
Le reste de mes biens espars en cent Prouinces
Je les laisse à mon Roy à qui ie les ay pris.

FIN.